

SPRM: Tiada kes yang disembunyikan

MalaysiaKini.com

5 Ogos, 2012

Oleh Hafiz Yatim

Tiada kes yang disembunyikan untuk mengelak berlaku skandal, kata Suruhanjaya Pencegahan Rasuah Malaysia (SPRM) yang merujuk kepada siasatan ke atas Peguam Negara Tan Sri Abdul Gani Patail.

Timbalan ketua pesuruhjaya SPRM Datuk Mohd Shukri Abdull berkata panel tersebut bertindak secara telus.

"Saya ingin menjawab dakwaan yang dibuat oleh bekas pengarah urusan Ho Hup. Saya ingin jelaskan bahawa siasatan SPRM adalah telus dan dibuat secara profesional tanpa mengira siapa yang disiasat.

"Semua kes dibentangkan di hadapan Panel Penilaian Operasi yang adil dan bebas," katanya yang meminta individu berkenaan supaya mengemukakan bukti sekiranya terdapat pegawai SPRM yang mahu menutup kes berkenaan.

Panel Penilaian Operasi itu dipengerusikan oleh bekas ketua audit negara Tan Sri Hadenan Abdul Jalil.

Penjelasan Shukri dalam SMS kepada Malaysiakini itu timbul ekoran dakwaan oleh pengarah urusan Ho Hup Construction Bhd Low Tuck Choy semalam bahawa SPRM hanya berminat untuk menutup kes berkenaan kerana pegawai yang tiba ke premis syarikat pembinaan itu bertanya mengenai sumber maklumat yang dibocorkan.

Low sebelum ini mendakwa bahawa dokumen yang mengaitkan dakwaan rasuah dan penyalahgunaan kuasa ke atas Abdul Gani adalah tulen dan beliau serta syarikat itu mengetahui identiti individu yang menandatangani baucer bayaran dan cek syarikat untuk membayar RM18,000 untuk penambahbaikan didakwa untuk banglo Abdul Gani di Seremban.

AbdulGani telah menafikan bahawa beliau memiliki hartanah di Seremban, di mana laporan blog sebelum ini mendakwa ia dimiliki oleh isteri kedua Abdul Gani.

Copyright © 1999-2012 Mkini Dotcom Sdn. Bhd

Source: <http://www.malaysiakini.com/news/205519>